



**Protocol da la radunanza generala 2019
dals 27 avrigl 2019, 9:30 – 12:30
illa chasa da scoula a Susch**

Tractandas

1. Salüd
2. Tscherna dals dombravuschs
3. Approvaziun dal protocol da la radunanza generala dals 21 avrigl 2018
4. Rapport dal president e da la vicepresidenta
5. Rapport da lavur da la LR (bilantsch 2010-2018)
6. Rendaquint 2018
7. Tour cogniziun dal rapport da la cumischiun sindicatoria
8. Approvaziun dals rendaquints 2017 e 2018
9. Program da lavur 2019/2020
10. Tschernas (president, suprastanza, revisurs, delegats LR e supleants dals delegats LR)
11. Fixar l'indemnisaziun per la suprastanza
12. Fixar la contribuziun annuala 2020
13. Preventiv 2020
14. Infuormaziun davart la festa da 100 ons LR
15. Varia

Preschaints:	33 commembras e commembers cun dret da vuschar
Medias:	3
Giasts:	2
S-chüsats:	D. Campell, J. D. Parolini, J. Flury, M. Pfäffli, M. D. Ellenmunter, A. Zanetti, V. Augustin, E. Müller, M. Salis, J. F. Huder, C. Fanzun, R. Kienz, D. Toutsch, C. Duschletta, A. Kirchen, R. Arquint, J. Guidon, N. Gaudenz, M.-Ch. Gisep-Hofmann, A. Ratti, A. Stupan, C. Lansel, J. Ruinatscha, B. Vital, L. Michel, G. Florineth, C. Collenberg, L. Marugg, G. Nicolai, M. R. Gilly, U. Kühne, R. Federspiel, R. Rusetta, U. Dubs, A. Zala, A. Besio, S. Bichel, F. Parolini, C. Koller-Mengiardi, G. Conrad, C. Hässig

1. Salüd

Il president da l'UdG, Hermann Thom salüda ils 38 preschaints e Martina Peretti-Müller, vicepresidenta e rapreschantanta dal cumün da Zernez dà ün cuort bivgnaint.

2. Tscherna dals dombravuschs

Sco dombravuschs vegnan tschernüts:

Duri Thom, Susch e
Fadri Häfner, Guarda.

3. Approvaziun dal protocol da la radunanza generala dals 21 avrigl 2018

Il protocol da la radunanza generala dals 21 avrigl 2018 vegn approvà.

4. Rapport dal president e da la vicepresidente

Pel president ha l'on da gestiun manà blera lavur, staintas, pissers e disgusts, disch Hermann Thom; el manzuna però eir mumaints da plaschair e satisfacziun. Las lezchas las plü importantas da la suprastanza sun statta la sanaziun da las finanzas e la revisiun dals statüts ingiò ch'üna cumischiun ha pudü cumanzar culla lavur. El ha organisà la festa da 40 ons Chesin Manella ed üna part da las occurrenz dal Chesin Manella ad interim. La situaziun da las medias rumantschas ha dumandà ün ingaschi special. In seis pled manzuna Hermann Thom eir la buna collavuraziun culla Lia Rumantscha.

La vicepresidente e respunsabla pel Chesin Manella, Angela Jan ingrazcha a Maria Dosch per seis grond ingaschamaint e per la lavur prestada a favur dal Chesin Manella. Maria Dosch ha gnü da cumbatter cun problems da sandà quai chi'd ha eir gnü consequenzas pel Chesin Manella. La butia es gnüda gestida ad interim dad substituets e'l temp d'avertüra es gnü redot. La situaziun ha chaschunà differenzas tanter Maria Dosch e la suprastanza ed in seguit es gnü scholt il contrat da lavur. Sco nouva administratura dal Chesin Manella ha la suprastanza tshernü a Dora Thom. Angela Jan preschainta üna statistica da la vendita dals ultims trais ons chi muossa cha ün terz da las entradas deriva da la vendita in butia e tshels duos terz da la vendita online e da postaziuns per e-mail, posta e telefon.

5. Rapport da lavur da la Lia Rumantsch

Mario Pult, il collavuratur regional da la Lia Rumantscha per l'Engiadina e la Val Müstair dal 2010 fin dal 2018 es i in pensiun. In seis rapport guarda el inavo sün sias activitats sco promotur da lingua e cultura rumantscha e tira bilantsch. Adüna nun han las fadias manà eir il success giavüschà: il proget *multiplicatuors* ha funcziunà bain in tsherts lös ed in oters brich; ils cuors d'integraziun linguistica sun il prüm pel solid ün bel success, ma davo manca il schlantsch per la cuntinuaziun, quai vala eir pels cuors d'integraziun socio-linguistica per portugais; pro'ls cuors intensivs es la situaziun plü allegraivla, quels han minch'on fich bliers partecipants. Cun üna vasta sporta da progets ed occurrenz ha Mario Pult provà da spordscher alch per tuot ils interessats: per la populaziun rumantscha, per scoulas indigenas e da la bassa, per mammas, per chanzlists ed officiants, per giasts e. u. i. ed a la fin manzuna el amo il *Pledpierla* chi'd ha gnü güst quist on cun 155 contribuziuns ün fich grond success.

Hermann Thom ingrazcha a Mario Pult per seis ingaschamaint instancabel a favur dal rumantsch e per la buna collavuraziun d'ürant quists ons. El til surdà ün regal da recugnuschentscha.

6. Rendaquint 2018

Il chaschier Romedi Conradin preschainta il rendaquint pel 2018. Quel serra cun ün s-chavd da frs 9'062.17. La vendita da la libreria s'ha diminuida per frs 3'168.87. Il Chalender Ladin es deficitari, il Dun da Nadal ha fat guadogn, la Chasa Paterna es statta ün bel success ed ils *Möds da dir* ha fat üna pitschna perdita. La gestiun generala es statta i'l rom dals ons avant. Da l'adattamaint da valor dals titels resulta pel 2018 ün minus. I's ha scholt reservas per dozar il chapital agen.

Discussiun:

Dumonda: L'import da frs. 25'000 pro contribuziuns Lia Rumantscha, es quai nouv?

Resposta: Da quel import sun frs. 15'000 contribuziun e frs. 10'000 sustegn da la gestiun dal Chesin Manella.

Dumonda: Pro titels da valor, da che aczias as tratta quai?

Resposta: Aczias da firmas dad IT e *high tech*; lönch s'ha lur valor augmantada, l'ultim temp es ella ida aval; l'intenziun da la suprastanza es da vender quists titels.

7. Tour cogniziun dal rapport da la cumischiun sindicatoria

Il president prelegia il rapport dals revisurs, Jan Ruinatscha e Duri Schewninger.

8. Approvaziun dals rendaquints 2017 e 2018

La radunanza approvescha il rendaquint dal 2018 e'l rendaquint dal 2017.

9. Program da lavur 2019/2020

Il president preschainta ils detagls dal program da lavur chi prevezza sper las acziuns ed ediziuns üsitadas la conclusiun da las lavurs per adattar las structures e'ls statüts da l'UdG ed üna festa dal giubileum 100 ons Chasa Paterna.

10. Tschernas

President: Hermann Thom as metta darcheu a disposiziun e vain elet cun acclamaziun.

Il rest da la suprastanza, Angela Jann, Chatrina Urech, Romedi Conradin e Duri Denoth as mettan darcheu a disposiziun e vegnan confermats cun acclamaziun.

Ils revisurs da quint, Jan Ruinatscha e Duri Schewninger chi's mettan eir danövmaing a disposiziun vegnan confermats cun acclamaziun.

Delegats per la Lia Rumantscha:

Dals delegats actuals as mettan darcheu a disposiziun Curdin Brunold, Renata Bott, Giancarlo Conrad e Gian Nicolay. Els vegnan confermats cun acclamaziun.

Steivan Gaudenz ha demischinà. Sco novs delegats vegnan propuonüts: Flurin Parolini, Samedan, Cilgia Koller-Mengiardi, Ardez, Angela Besio, Zernez ed Anna Zala, Zernez. In tscherna cun scrutin vegnan elets cun 19 vuschs Anna Zala e cun 14 vuschs Flurin Parolini.

Suppleants per la Lia Rumantscha:

Cilgia Koller-Mengiardi, Ardez, Angela Besio, Zernez, Corina Hässig, Ardez, Romana Ruosette, Val Müstair e Cilgia Scherrer Ganzoni, Samedan vegnan tschernüts cun acclamaziun.

Suppleant da la delegada illa suprastanza da la Lia Rumantscha:

Anna Chatrina Brunold ha demischinà e la suprastanza propuona a Romedi Conradin sco candidat per quel post. La radunanza conferma cun acclamaziun a Romedi Conradin sco candidat. La tscherna definitiva vegn fatta da la radunanza da delegats da la Lia Rumantscha.

11. Fixar l'indemnisaziun per la suprastanza

La suprastanza propuona da müdar il reglamaint per l'indemnisaziun seguaintamaing: president: actual frs. 3'000 nov frs. 2'500; chaschier: actual frs. 1'500 nov frs. 1'000; ulteriurs commembers da la suprastanza: actual frs. 750 nov frs. 1'000

Our dal public vegn fatta la proposta da fixar l'indemnisaziun per mincha commember da la suprastanza ad ün import da frs. 1'100.

Cun gronda majoranza fa la radunanza bun la proposta da la suprastanza.

12. Fixar la contribuziun annuala

Pervi dal deficit cha'l Chalender Ladin ha fat ils ultims ons propuona la suprastanza da dozar la contribuziun annuala (e predscha dal Chalender Ladin) dad actual frs. 16.00 a nov frs. 18.00. Cun gronda majoranza fa la radunanza bun la proposta da la suprastanza.

13. Preventiv 2020

Romedi Conradin preschainta il preventiv 2020 chi prevezza ün s-chavd da frs 6'000 e da explicaziuns pro divers puncts.

La radunanza appovescha unanimamaing il program da lavur 2019/2020 e'l preventiv 2020.

14. Infuormaziun davart la festa da 100 ons LR

Martin Gabriel, secretari general Lia Rumantscha da infuormaziun generalas davart la festa da 100 ons. El preschainta il nov model da collavuraziun da las medias rumantschas.

Gianna Olinda Cadonau da üna survista plü detagliada dal program da la festa da 100 ons. Temas specifics engiadinai vegnan sports in collavuraziun cun l'UdG ed i'l program accumpagnant da Martina Shuler.

15. Varia

Tresa Deplazes salüda ils preschaints in nom da la *Pro Idioms Surselva*.

Discussiun:

Büджет exagerà per la festa 100 LR:

In ün votum vegn fatta la dumonda: Nu füssa da redüer il budget exagerà da la festa da 100 ons, chi surpassa frs. 1'000'000 a favur da lavur continuanta per lingua e cultura?

Gianna Olinda Cadonau respuonda chi saja blerun plü simpel da mobilisar finanzas per il gener da festa chi vegn fat co per lavur continuanta e cha la festa dess esser ün acziun visibla per tuot ils rumantschs e per tuot la Svizra.

Model da collavuraziun da las medias rumantschas:

In ün votum vegna dumandà scha la suprastanza da l'UdG haja l'intenziun da promover *La Quotidiana*?

Il president respuonda, cha la suprastanza da l'UdG sustegna il proget da collavuraziun da las medias rumantschas; cha la promoziun da *La Quotidiana* nu saja però üna lezcha da la suprastanza.

Uffants da la Val Müstair frequentan canortas giò'l Vnuost:

In ün votum vegna constatà cha famiglias giuvnas da la Val Müstair mettan lur uffant in canortas our il Tirol dal Süd ingio chi'd imprendan tirolais!

Il secretari general da la LR respuonda cha canortas vegnan realisadas sün iniziativa privata e nu suottastan a reglamaints chantunals o comünals.

Integraziun linguistica:

In ün votum vegna constatà cha'l chantun nu sustegna l'integraziun linguistica i'ls idioms; ch'el paja a seis personal be ils cuosts per cuors da rumantsch grischun quai chi nu motivescha ad impiegats dal chantun dad imprendder l'idiom dal lö da domicil.

Il secretari general da la LR respuonda cha l'impuls per üna correctura stopcha gnir da la politica e cha la LR voul iniziar la discussiun illa Gruppa rumantscha dal Cussagl grond.

Il president Hermann Thom ingrazcha per tuot quai chi vegn fat a favur da lingua e cultura rumantscha e serra la radunanza.

Pel protocol
l'actuar



Duri Denoth